

तिमोथीलाई

पावलए उस०कताव परींद ओयो चिथी

तिमोथी एसिया खन्दलाव तोबो मिं ज़। ओआमा उयुं हुबो यहूदिनी, ओबाबु ते उयुं माहुबो उलिज़्याव (ओसाचीर १६:१-३)। तिमोथी परमेस्वरए ओयेनत पावलस ज़ा बाबु मिताव ज़ निलिज़्याव (१ तिमोथी १:२)। तिमोथीए एफिसस सहरलाव मन्दलीलाई ओसमारिज़्याव। नो पोल धुतनी पैज़्यावर, अङ्ग्या पुजा दोज़्यावर सोनो पातर्या पातर्नी जैसिज़्यावर बनै ज़ यालिज़्याव (१:३-११; ४:१-८; ६:३-५)। है जैद आव चिथील पावलए तिमोथीलाई मन्दलील निताव ताताक लिद नो पॉर वैव उपरीव सतैसिउ लिज़्या (१:३)। मन्दलीलाव लोम्बार सोनो नलाव येनत सघैज़्याव सेरर 'इताव ताव परिके' लिन्या ब सरै:सिउ लिज़्या (३:१-१३)।

१ डा पावल गेलाई बाँचैज़्याव परमेस्वर सोनो आस दाद गेनैज़्याव येसु ख्रीसनी है निदाँवनी ज़ येसु ख्रीसए ओसाची खतैसिउ डालिज़्या। २ आव ड़ासरो चिथी नँ तिमोथीलाई परींद डाईज़्या। परमेस्वरए ओपाँत गिन साचो ज़ा बाबु मिताव गिन्लिज़्या। नलयोदा गेबाबु परमेस्वर सोनो गेप्रभु येसु ख्रीसनी नियुं ओय़ाल्क, नियुं ओगराँक, नँ नयुं ब होलाँ जैद उईनिक।

परमेस्वरए ओपाँ धुतनी पैज़्यावर

३ माकेदोनियादा डाबारिज़्याकाव है डादींज़्याव मिताव नँ एफिससल ज़ लिद परमेस्वरए ओपाँ धुतनी पैज़्यावरालाई, 'निताव मा:क' है दाद वैव ताके। ४ नोराए ओअर्थ माल्यो घर्ती बिन्तीर झा:द अन्नाकल ज़ खरडाव मरडावराए मिनर यारापैज़्यार। ननी माथ०रिउ ओर्घाँताव पॉर वाज़ पुलुसज़्या। परमेस्वरए उयुंलाव मिताव ते युं हुपून्यानी वाज़ ताज़्या। ५ डा है ल्यो डापैज़्याव ते, या याल साचो युंस ओखैरक, सोनो परमेस्वरए ओपाँत यायुं हुपूद

छैव युँस ज़ उलिरक। 6 खाली ख्वा मिँ ते आव चाव पाँलाई माथरैधुद अनाकलाव पाँ जील ज़ डोइद लेर। 7 नोराए, 'परमेस्वरए ओकानुनलाव यागुर्बार गे ज़,' है लिज़्यार। खाली 'आव ज़' है यारादोदी ब यापाँव पाँ याज़ माबुञ्जिधुर।

8गे ज़ गेसैज़्या, चावस चलैकिन परमेस्वरए ओकानुन चाव ज़ लिज़्या। 9 परमेस्वरए ओकानुन परमेस्वरस खैव मिँ जूँनी माःक। नो कानुन ते कानुन तैःज़्यावर सोनो माभैःज़्यावर, परमेस्वरए ओपाँलाई सोज़्याव पापीर, चाव पाँत ल०द परमेस्वर माले है लिज़्यावर, याबाबु याआमार सैःज़्यावर, मिँ सैःज़्यावर, 10 पातर्या पातर्नी जैसिज़्यावर, खेपा-खेपाल पातर्या जैसिज़्यावर, मिँ योःज़्यावर, धुत पाँज्यावर, धुत गोहाई याज्यावर सोनो परमेस्वरए साचो थ०रिउ ओपाँकिन तँदा बाज्यावराए जूँनी जैसिउ लिज़्या। 11 नो थ०रिउ पाँ उयुँ याल्ज्याव माहान परमेस्वरए डालाई सथैव उपरीनाव चाव था मिताव ज़ लिज़्या।

पावलए ल्योदा परमेस्वरए उयुँ ओगराँव

12डालाई सघैज़्याव गेप्रभु येसु ख्रीसलाई बनै धन्याबाद लिज़्या। ओल ज़ डालाई उयुँ हुबो थरैद ओयेनत खतैनाक्यो। 13 डा डादाकिन उमिन बलेद्याद उमिनत बाज्यावराए याखिरी पसिद बनै हाप हाप डाख्याज़्याव। खाली आव भरी ओललाई मासरेस्द मासैद डादोवए उयुँ नाद डालाई रास्नाक्यो। 14 डाल्योदा उयुँ याल्द डाक्याँताव ओयाँव असिक झन धोल पोगोल ताके। हिताव ज़ येसु ख्रीसनी डादैव युँ हुपन्या सोनो ओमया ओल ज़ डालाई याँक्यो। 15 आव पाँ बनै थ०रिउ युँ हुपन्याकाव पाँ ज़ लिज़्या — येसु ख्रीसए आव मानुवाताव पापीरालाई बाँचैन्याए जूँनी हुके। नो भरिरानी प्राइँरानी पापी डा ज़। 16 हितावत ब येसु ख्रीसए पापीरालाई कुधु ओरासहिज़्याव प्राइँलाई सतैँद्यान्याए जूँनी डा पापीराकिन ब पापीलाई परमेस्वरए उयुँ गराँके। हिताव ज़ छींनीकाव ओललाई

यायुं हुप्यावराए अजम्बरी जुनी दैन्याए जूनी डा डाक्याँताव ओदोव दया याडाक सतैसिउ मिताव लिज्या। 17 है जैद छींड पै रहिज्याव सुए ज़ यामारैःधुज्याव खर्क ज़ मासिज्याव गेराजा, तोबोका तोबो परमेस्वरलाई ओमान ब ओताक, ज़गैवलाव उमिन ब छींड पै उरहिक। आमेन।

तिमोथीलाई पावलए ओयो हुकुम

18परमेस्वरनिकाव डाजा तिमोथी, डादा नजूनी परमेस्वरए उपुरुसनी यापाँव पाँलाई याका दाद परमेस्वरए ओयेनत नँ सिपाई मिताव जैसिद नो पाँदा ध्यावना दाव ताके। 19 स्त्रीसताव नयुं नसुहुबोलाई जात ज़ मारासूद छैव युँस दाव ज़ नैयो। ख्वाराए ते छैव युँस दान्या यामाभैःवए यायुं यासुहुबोलाई ब झन ज़ नोक्सान जैकेर। 20 हुमेनियस सोनो अलेक्जेन्डरनी ब निताव ज़ ताकिनी। है जैद स्त्रीसए उमिन बलेःन्या ओमाताज्याव ओल्यो लिन्या घदासिनिक लिद नोनिलाई सैतानए उकुइत ज़ झाःद डानिनै।

2

मन्दलीए पोंखारिन्या पाँर

1डा प्राइरानी डात जेलाई बिन्ती दाद है डादाचिज्या — प्राइँ मिँराए जूनी पोंखारिच्यो, परमेस्वरए ओअसिक ब निद याराएच्यो। नोराए जूनी धन्याबाद ब चरैःच्यो। 2 सोनो गे परमेस्वरए उमिनतावराए युँ होलाँ जैद रान छानस 'गेजिउ भरी परमेस्वरए उमिनलाई सघ्योःद ओमान नैद्याव गेदैक' लिद राजार सोनो घेपूपा हक दैवराए जूनी ब पोंखारिउ ताके। 3 नितावरालाई पोंखारिद्यान्या गेलाई बाँचैज्याव परमेस्वरए उयुँलाव मिताव येन ब लिज्या। 4 होए, प्राइँ ज़ साचो पाँलाई सरेसूद अजम्बरी जुनी ओदैरक लिन्या युँ दोज्याव। 5 परमेस्वर तोबोका तोबो वाज़ लिज्या। गे मिँरालाई परमेस्वरस सखैःन्या गेत्याला ब तोबो वाज़ लिज्या — हो मिँ मिन्सिद हुव येसु स्त्रीस ज़। 6 होए प्राइँ यापापए सजा फोःद्यान्याए जूनी उजिउ

ब झाःद याएक्यो। ननी ज़ परमेस्वरए ओगोइँव बेलाक ओसाची सरैःद्यासिक्यो। 7 डा परमेस्वरए साचो ओपाँत ओकत्वाल्या जैसिद छुत जातलाव मिँरालाई नो पाँत सिऊद यायुँ सुहुपूद्यान्या ओसाची खतैसिउ डालिज्या। आव डापाँ ससैसिउ माःक, ओअर्थ ज़ लिज्या।

8फरी ब है डालिज्या, प्राइँ पोडाव यायुँ हुबो खेपाराए छैँव युँस ओपोँखारिरक। या याल यायुँल माखैव तानैरक। 9 परमेस्वरए ओपाँत बाज्याव मेंमाराए थिककाव पैरन ओदोरक। बनै ओएः ल्यो गहनार जासिद ओएः ल्यो क्वार क्वाइसिद सोनो याचेमर छन्दनी भाँती जैद तासिडारैसिरक। 10 बुरू चाव येननी ज़ परमेस्वरए ओमान नैद्याज्याव मेंमारालाई यासहिज्याव। 11 मेंमार याथकानस लिद इयाउँ इयाउँ मालिद ओपैसिरक। 12 डा मेंमारालाई खेपाराए डैत हक चलैन्या सोनो पैन्या डामाराजैए। बुरू नोर चिम दाद उलिरक।* 13 काराव ल्यो ताकिन परमेस्वरए ड़ात आदमलाई जैक्यो, नकिन हब्बालाई जैक्यो। 14 झुकिउ आदम माःक, झुकिद पापल परिउ हब्बा ची। 15 हैदी ब मेंमार परमेस्वरलाई यायुँ हुपूद ओमयाल छैँवस लिद परमेस्वरए उयुँलाव मिताव येनर यादोकिन ज़ा यादैक परमेस्वरए नोरालाई जोगोइन्या ले।†

3

मन्दलीलाव लोम्बार

1आव साचो पाँ लिज्या, जो मिँ मन्दलीलाव लोम्बा जैसिउ पैँज्याव, होए चाव येन ज़ खिम्ज्याव। 2 खाली नो मिँ प्राइँत ज़ ओखत माल्यो ताव परिके। नोए ओज्या ब तोबो वाज़ ओताक, सोनो प्राइँल थोरिउ, ओतहस ओमानस ल्यो, पाहुनार समारिन्या,

* 2:12 2:12 ख्वा ख्वा बिद्वानराए याबिचारनी हो बेलाकाव मेंमार मापरिउर याल्योए पावलए नितावनी ओपाँव। 2:13 2:13 उत २:७,२१-२२ 2:14 2:14 उत ३:१-६

† 2:15 2:15 छुत बुझिन्या – बाँचैन्या ले।

परमेस्वरए ओपाँ पैन्यात ओगहक ल्यो ओताक। 3 फरी नो मिँ मद छोकोरा ओन्यात माङ्मो, पैसाए लोभदा ब माबाव, इंसिन्या रसिन्या ओयाःनी मापलेद ओमानस ल्यो ओताक। 4 उझिम चावस चलैधुन्या, ओज्जारालाई ब चावस ज़ दईद मुइलिउर जैधुन्या ओताक। 5 जोए उझिमलावरलाई चावस माराचलैधुव होए परमेस्वरए ओमन्दलीलाई इन कै जैद ओचलैधुरिज्याव? 6 सोनो नो लोम्बा जैसिज्याव मिँ भर्जा परमेस्वरए ओपाँत हुव ताताक, मानी कैताराक स०द सैतान उपरिउल ओल मनी परिन्या ओछ्यास लिज्या। 7 फरी परमेस्वरए ओपाँत माहुव मिँराए याङ्काक ब चाव उमिन ल्यो ओताक, मानी नोराए नोए ओपाँःच्यार हाइद याएक सैतानए ओजालल परिन्या ले।

मन्दलीलाव येनत सघैज्याव सेरर

8हिताव ज़ मन्दलीलाव येनत सघैज्याव सेरर ब यामानस ल्योर, यापाँ नेपाँ माल्योर, मद छोकोरा ओन्यात माङ्मोर, पैसाए लोभदा माबाज्यावर ओतारक। 9 बुरू यादैव युँ हुबो फैसिउ पाँलाई चावस तीद नत ज़ छैव युँस धिद उलिरक। 10 नोरालाई डादा जाँचिद याखत माल्योर याथ०रिकिन वाज्ज मन्दलीलाव सेवात सघैन्या येन ओदोरक। 11 सेवात सघैन्या मेंमार* ब यासुबास ल्योर, अर्काए उछीनी मापाँन्यार, यातहस ल्योर, प्राइँत सतस ल्योर ओतारक। 12 सेवात सघैन्या खेपार फरी याज्या तोबो वाज्ज ओताक। याज्जार सोनो याझिमलावरलाई ब चावस ओराचलैरक। 13 निताव सेवात सघैन्या येन दाज्यावराए यामिन स्यासो चाव येन यादोकिन नोराए यामान ब रहिन्या ले, येसु खीसए ओपाँत ब यायुँर इन ज़ हुपन्या ले।

परमेस्वरए कप्सिउ ओपाँ

14-15डा नल्योदा चाँदो ज़ हुन्या युँ डादोज्या। खाली 'कैताराक

* 3:11 3:11 छुत बुझिन्या — मन्दलीलाव येनत सघैज्याव सेरराए याज्यार।

धिलो ताए सै' लिद आव चिथी झ़ादा ज़ सर्द डापरींजूया। आव चिथीनी ज़, 'गे परमेस्वरए उझिमलावराए इतावनी दोव ताके' लिन्या प्राइँ ज़ सैन्या जेले। परमेस्वरए उझिमलावर जींदो परमेस्वरए ओमन्दली ज़, साचो ओपाँलाई थरैद्याज्याव गज तर्ताव खाँबा ज़। 16 साचो ज़ आव गेमानिजूयाव परमेस्वरए कप्सिउ ओपाँ ते बनै अचम्बलाव लिजूया,
 परमेस्वर मिँए क्य़ाँ जैसिद सरैःसिके।
 छैव पुरूसनी साचो ज़ थ०रिके।
 ओचाकर्याराए याडाक ब सरैःसिके।
 उमिन प्राइँ जातलावराए याखार्ल थास्के।
 संसारलाव काना कुनीड ब यायुँ हुपके।
 छीनी स्वर्गताव ओज़गैदा ज़ छींसिके।

4

धुत पाँर पैन्या लेर

1परमेस्वरए उपुरूसए छर्लङ्ग ज़ है लिजूया, छीनीकाव हुन्या बेलाक ख्वा मिँराए परमेस्वरए ओपाँ रास्द सैतान सोनो झुकैजूयाव पुरूसराए यारापैजूयाव पाँदा ज़ बान्या लेर। 2 निताव पाँर पाजीराए याछलनी ज़ रासिन्या ले। नोराए, 'धुतनी गेरापैजूया' लिन्या सैजूयावत ब यायुँ राव झँए दामिसिउ मिताव लातासो तान्या ले। 3 नोराए, 'बिह्या ब दान्या माताए, रूवा रूवा ज़्यावर ब ज़यान्या माताए' है लिद यारापैरिजूयार। जे ते जेसैजूया, नो भरी परमेस्वरए गे साचो ओपाँर सैद गेयुँ हुबोरालाई खुसीस ज़यान्या जैद नैद्यासिउ। 4 परमेस्वरए ओजैव भरी चाव ज़ लिजूया। जो ज़्याव ब, 'आव परमेस्वरनी हुव ज़' लिद धन्याबाद चरैःद खुसीस गेजूयुकिन माजूयान्या काता ज़ माले। 5 परमेस्वरए ओपाँत युँ हुपद पोखारिकिन प्राइँ चोखो ज़ ताजूया।

धुत पाँलाई वैद साचो पाँ सथैन्या

6 आव पाँ भरी परमेस्वरए ओपाँत हुवरालाई चावस नरासमजैकिन येसु स्त्रीसए चाव ओनोकोर थ०रिन्या नले, सोनो डादाकिन ज़ नदोहुज्याव नयुँ हुबो साचो परमेस्वरए ओपाँनी नबुद्धी ब इन ज़ छिपनान्या ले। 7 नलाव मिँराए याझाःज्याव उर्ती माल्यो घर्ती बिन्तीर ताथैयो। बुरू नँ परमेस्वरए उयुँलाव मिताव छेंव युँ जैन्यादा उहिल हाइके। 8 क्याँए जूनी उहिल हाइज्याव देखा युँल परमेस्वरए उयुँलाव मितावदा उहिल हाइन्या बनै ओचाहित ल्यो लिज्या। नोए ओफाइदा आव जुनील ब ताज्या, अजम्बरी जुनील ब ताज्या। 9 आव पाँ थ०रिउ, युँ हुपन्याकाव पाँ ज़ लिज्या। 10 नो फाइदाए जूनी ज़ परमेस्वरए ओयेनत कलँ लिद धामा गेदोज्या, काराव ल्यो ताकिन गेआस जीदो परमेस्वरए ल्योदा ज़ लिज्या। नोए ज़ प्राइँ मिँरालाई, खास ते यायुँ हुबोरालाई याबाँचैज्याव।

11 है जैद नँ आव पाँरानी ज़ पैद याअरैयो। 12 नरापैक सुवाराए, 'इताव भर्जाकावए ओपाँ काता थैन्या' लिद हेला रैःन्या स्यासो तातानी। बुरू नँ नपाँ, नचाल चलन, नमया सोनो नयुँ हुपद छेंव युँस नदोज्यावनी यायुँ हुबो प्राइँराए उसिऊसिरक। 13 डा डामाहुवा पै मन्दलीलावरालाई धर्मसास्र प्ररिद्याद यायुँ सङ्गेःद्याद यापैयो। 14 डादा मन्दलीलाव सेरराए नक्याँत याकुइ नैद परमेस्वरए उपुरूसनी यापाँज्याक नदैव बरदानलाई मारासुद दाव येन ज़ दोयो। 15 आव प्राइँ पाँत नयुँ थू जैद दाव ज़ नैयो। हो ताकिन ची नँ खा डादा नबाज्याव नक्याँत इन ज़ रैःन्या ले। 16 नक्याँए जूनी सोनो नरापैज्याव पाँलाई ब जाँचिद जोगोइसिद दोयो। इतावदा धामा नदोकिन अजम्बरी जुनील नँ ब नतारिज्या, नपाँ थैज्यावर मनी नल ज़ तारिज्यार।

5

ओगल्ती ल्योलाई सम्जैन्या

1 नँकिन सेरए ओगल्ती उलिकिन नोलाई खोरोनी है दान्या माःक,

बुरू क्याँए बाबु स्यासो जैद सम्जैव ताके। नँकिन नधूँदाडाव ताकिन क्याँए भाइ स्यासो जैद सम्जैव ताके। 2 हो मिताव ज़ मेंमारालाई मनी तर्दाडाव ताकिन आमा स्यासो, धूँदाडाव ताकिन बैनी स्यासो जैद छैँव युँस सम्जैव ताके।

राँदी मेंमारालाई समारिन्या

3 चिऊन्या मिँ माल्यो राँदी मेंमारालाई चावस समारिद याराचिऊच्यो। 4 फरी नो राँदी मेंमाए ओज़ार ओनातीर यालिकिन नोराए ज़ समारिद पाथस ओनैरक। डादा याक्याँदाडावराए ल्योदा धर्मलाव येन दान्या ओपैसिरक। ननी ज़ याबाबु याआमाराए याभार क्याल्सिद परमेस्वरए उयुँलाव मिताव ब ताज़या। 5 चिऊन्या मिँ माल्यो राँदी मेंमाए परमेस्वरए ल्योदा उयुँ थू जैद लाकनी रील पोंखारिज़्याव। 6 नो फरी, ओमन लागिउ माचाहिउ जीदा दुलिरिज़्याव उलिकिन नो मासिद ज़ सिउ स्यासो ताके। 7 है जैद नोर मनी याखत माल्यो छैँवर घतारक लिद नँ आव तोबो नेब्लो पाँ ब यासथैयो। 8 खाली जोए ओक्याँदाडावरालाई ब मारासमारिउ, होकिन झन उझिमलावरालाई ओमारासमारिकिन, नो मिँ परमेस्वरए ओपाँ रासोल गनिसिज़्या। परमेस्वरए ओपाँत खर्क ज़ माहुव मिँकिन ब माचाव ताज़या। 9 सोनो जे परमेस्वरए उमिनत दुपसिज़्याव राँदी मेंमारालाई जेरासघैक साथी बर्सकिन यादाडावए उमिन वाज़ सर्द नैच्यो। नो मेंमा ओरेए ओसतत ल्यो,* 10 चाव येनत उमिन थासो, ओज़ारालाई उघुरिउर जैव, उझिमक हुज़्यावरालाई चावस नैज़्याव, परमेस्वरए छैँव उमीराए यासेवा दाव, दुखल लिज़्यावरालाई सुम्द समारिज़्याव, जो येनत ब चाव येन दाज़्याव ओताक।

11 धामेँ राँदी मेंमाराए यामिन ते तासर्च्यो। नोर कसाराक ख्रीसए ओसेवा दान्या य़ाका मादाद रे दान्यादा वाज़ यायुँ थू याजैकिन, 12 याझाःव किर्याल बुदिद नोर याखत ल्योर थ०रिन्या ओछ्यास

* 5:9 5:9 छुत बुझिन्या — नो मेंमाए ओरे तोबो वाज़ ताव।

लिङ्ग्या।† 13 ख्वा ख्वा र फरी येन मादाद झिम झिमक दुलिद माचाहिउ पाँर आदा होदा जैद माथैन्या पाँर थैद वै वै जैन्या ब लेर। 14 हो देखा बुरू धामे राँदी मेंमाराए रेर दाद ज़ार दैद झिमकाव येन ओदोरक। हो ताकिन गेसुतुरराए गेमिन बले-द्यान्या येम दैन्या मालेर। 15 हितावत ब ख्वा ख्वा राँदी मेंमार ते सैतानए ल्योदा धल्किधुकेर। 16 है जैद ख्वा यार्युं हुबो मेंमारास राँदी मेंमार यालिकिन होराए ज़ ओराचिऊरक, मन्दलीलाई घचैन्या माःक। मन्दलीए बुरू याक्याँदाडाव सु ज़ माल्यो राँदी मेंमारालाई माथैव मायोःवल ओराचिऊरक।

लोम्बारालाई यामान नैद्यान्या

17मन्दलीलाई चावनी चलैज्याव परमेस्वरए ओपाँ बनै धामास पैज्याव लोम्बारालाई सघैन्या सोनो मान दैन्याकावर ज़ गनिउ परिके। 18 काराव ल्यो ताकिन धर्मसास्रल इताव सर्सिउ लिङ्ग्या, “दाइ झाःज्याव घेलाई ओयाःत महला झाःद्यान्या माताए,” सोनो, “येन दाज्याव मिँए ब ओजेला दैन्या हक लिङ्ग्या।”

19सुवाराए मन्दलीलाव लोम्बालाई ओपाहा झाःद्याव यापैकिन नेब्लो सोम्लोराए यापाँ ओमाखैवा पै थै ज़ ताथैच्यो। 20 नोए ओगल्ती उथरिकिन प्राइँए डाक सिडारो ताके। हो ताकिन उपुर्कावर मनी माचाव येन दान्या छैन्या लेर। 21 डा नँलाई परमेस्वरए ओडाक, येसु ख्रीसए ओडाक सोनो ओराखतैव चाकर्याराए याडाक डाअरैनिङ्ग्या, जो मिँलाई तादी ब आव पाँ भरी मिँ रैःद तादोयो।

22मन्दलीलाव लोम्बार नराजैक चावस माथरैद ताराजैयो। छीनी नोराए यागल्ती उपुलुस्किन नोरास नँ नपाहा ब बान्या ले।

† 5:12 5:11-12 ख्वा ख्वा बिद्वानराए याबिचारनी हो बेलाकाव ख्वा ख्वा मेंमार राँदी याताक ‘अबकिन रे मादाद ख्रीसए ओसेवा वाज़ गेदोया’ लिद किर्या याझाःज्याव।

5:18 5:18 ब्य २५:४; लूक १०:७ 5:19 5:19 ब्य १७:६; १९:१५

नितावनी नपाँःच्या तापुलुस्क। 23 नँ फरी झादाकिनकाव मिताव री वाज ताओयो। नो कैताक कैताक हुज्याव नजोरो सोनो नफूलाव बेथाए जूनी तुपुरू तुपुरू दाखमद्य ओयो।

24 ख्वा ख्वाराए यागल्ती ते छुतराए है यामारादोदी ब ओलनी ज़ छर्लङ्ग रैंःजूया। ख्वा ख्वाराए यागल्ती फरी झादा मापुलुस्द छीनी वाज रैंःजूया। 25 हो मिताव ज़ ख्वा ख्वा मिँराए चाव यायेन ब झादा ज़ रैंःजूया। कितर यायेन आछिम ओमोसिदी ब तछा जुनी ब चावनी ज़ रैंःन्या ले।

6

परमेस्वरए ओपाँत हुव बाँदार

1 परमेस्वरए ओपाँत हुव बाँदाराए फरी यासाहुराए याधूँल लिद यामान नैद ओराएरक। हो ताकिन ची छुतराए परमेस्वरए उमिन ब बलेव दैन्या मालेर, गेपाँए उगुस्ती ब दाधुन्या मालेर। 2 ख्वा ख्वा बाँदाराए यासाहुर यायुँ हुबोर यालिकिन, 'परमेस्वरनी ते दाज्यु भाइ ज़ ची गिन्ल्यो, काराव ओमान नैद्यान्या?' है तालिरक। बुरू, 'उयुँ हुबो गेयुँलाव मिँए ओयेन गेदोज्या' लिद इन ज़ चावस सेवा ओदोरक।

रूप्या पैसाए लोभ

है जैद नँ आव पाँर पैद यासम्जैयो। 3 जोए गेप्रभु येसु ख्रीसए साचो ओपाँलाई माभैःद परमेस्वरस खैन्या येमकिन तँनी ओरापैकिन, 4 नो मिँ काता ज़ ओमासैँजूयावत ब स०द सघ्योःसिजूया। निताव मिँर तके पाँत ब खर्लेसिन्या इसिन्या वाज खिमज्यार। ननी ज़ खिसून्या, माखैन्या, थलून्या सोनो साँन्या वाज ताजूया। 5 नितावराए यायुँ बिप्यादा तासिउ ताद यायुँल परमेस्वरए साचो ओपाँ वैसिउ उलिजूयावए या याल ब माखैर। नोराए यादोज्याव धर्मनी यालाई तान्या यातिर वाज दोजूयार। 6 साचो ज़ परमेस्वरए ओपाँ दान्या ते सोन्तोकोस लिन्या ज़, नो ज़ गेलाई घेप्पा फाइदा लिजूया। 7 गे

आव मानुवात गेहुक काता ज़ रैद गेमाहुइ। गेबाक ब काता ज़ मालाँद बान्या गेले। ⁸ गेलाई ज़्यान्या क्वाइसिन्या उलिकिन नाःत ज़ सोन्तोकोस ल्यो ताके। ⁹ नो कोसै पैंज्यावर ते पापल पारैज्याव छे छे डम्सिउ झिबला मितावल परिज्यार। नो कोसै यापैंज्यावनी ज़ माचाहिउ बलेसून्या येन दाद यानी ज़ नास तान्याल बाज्यार। ¹⁰ रूप्या पैसादा युं थू जैन्या ज़ माचाव भरिए ओजरा। रूवा रूवाराए यायुं नदा ज़ झाःद परमेस्वरए ओपाँनी तँदा यातर्किउए यायुंलाई याज़ घोइज्यार।

माचाहिउ पाँ वैन्यात सा झाःन्या

¹¹ खाली नँ परमेस्वरए उयुंलाव मिँ, आव पाँरानी अछतड लिनी। बुरू नँ सोजोनी दान्या, परमेस्वरस खैन्या, परमेस्वरलाई युं हुपून्या, मुइलिउ ताद नै मेए ल्योदा युं थू जैद खैन्या, थ०रिद तहस लिन्यादा कलँ लिनी। ¹² परमेस्वरए ओपाँनी माचाव पाँलाई हारैद वैन्यात नर्सा झाःयो। सोनो परमेस्वरए खुल्द याद ओनैनिज्याव अजम्बरी जुनीलाई तारास्यो। नँ डादा ज़ ‘हो येम ज़ डाबारिज्या’ लिद कुधुराए डाक नथाँसिके। ¹³ डा नँलाई, पाइँलाई यास० झाःद्याज्याव परमेस्वर सोनो पन्तियस पिलातसए ओडाकाव साचो पाँलाई थरैद्याज्याव येसु ख्रीसनी निमिननी डाअर्थेनिज्या, ¹⁴ गेप्रभु येसु ख्रीस फरी ओमासरैःसिवा पै नँ आव पाँ भरित नपाँःच्या मापलेःद बनै सतस दोयो। ¹⁵ नोलाई ओल परमेस्वरए ओगोइँव बेलाक ज़ सरैःरिज्याव। नो सरैःज्याव गेपरमेस्वर बनै असिक ल्यो तोबोका तोबो नाम नमलावराए याडैताव, राजाराए याराजा, प्रभुराए याप्रभु, ¹⁶ खर्क ज़ मासिज्याव, सु ज़ यामालिधुज्याव ज़गैल लिज्याव, सुए ब यामारैःधुज्याव परमेस्वर ज़। नोलाई बनै घेप्पा मान सोनो खर्क ज़ माखेमून्या राज काज ब ओताक। आमेन।

धनीरालाई सम्जैन्या

¹⁷ नँ आव जुकलाव धनीरालाई ब है यादोयो — नोर स०द

तासध्योःसिरक, सोनो याआस खेमून्या धन सम्पतीत तानैरक। बुरू गेरुंर होलाँ जैद्यान्याए जूनी प्राइँ जोरैद्याज्याव परमेस्वरए ल्योदा यारुँ थू ओजैरक। 18 नोर धन कमैन्याए ओपोल चाव येनर दाद युँ गराँव ताद छुतलाई याधुन्यार ओतारक। 19 इतावनी ज़ अजम्बरी जुनीए सामा यादोकिन साचो जुनीए थालन याझाःज्याव मिताव ज़ ताज्या।

आव पाँलाई पाथस नैव ताके

20अ तिमोथी, नँलाई परमेस्वरए नकुडत याद ओनैनिज्याव भरी पाथस नैयो। आव मानुवाताव अनाकलाव माचाहिउ पाँरानी सोनो सैन्या जैसिज्यावराए 'आव ज़ ग्यान' लिद याथरैवनी अछतड लिनी। 21 रूवा रूवार ते झन नो येम ज़ बाद परमेस्वरए ओपाँकिन तँदा ज़ बाद लेर। परमेस्वरए उरुँ जेल्योदा ओय़ाल्क।

साःरो बाचा

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd